

# DeSnude\$

Siman pasá, dos kabayero pa kua mi tabata anfitrión a regresá na nan país. Nan no solamente a “tour” e isla, ma nan tambe a deseá pa desfrutá di nos laman. Esaki a dunámi ekskusa pa mi mes bai laman.

Un dia, nos a para na bich ku antes tabata konosí komo Fòrn’i Kalki. Nos tabata kla pa drenta awa ora mi yu a bisámi ku un dama riba bich tabata tòplès. Mi tabatin bèrguensa ku mi a hinka mi bishitantenan den un situashon asina.

Den nos paseo, mi a hiba mi bishitantenan banda di laman na Playa Pabou. Un mama tabata para den awa ku su yu chikitu sunú. Ma loke a ofendémi ta ku e dama tabata tòplès—den pleno bista di e habitantenan di e kasnan i tur outo ku ta pasa.

Un otro dia, djaleu mi a mira dos kabayero para kombersá banda di un outo stashoná dilanti un hotel. Ora m’a yega serka, diripiente—sin tene kuenta ken por mir’è—un di e hòmbenan a kita su karson manera nada n’ pasa. No keriendo loke mi a mira, mi a drai wak atrobe. Fuera di su kamisa, e tabata blo sunú.

Último dia di e estadia, nos a bai Klein Bonaire. Despues di pone nos djùk di awa i serbèrtè den e ramada, nos a desfrutá di laman. Promé ku *Kantika di Amor* a bin buska nos, nos a regresá n’e ramada pa warda.

Un boto chikitu ku tres dama i shete kabayero a ankra dilanti kosta. Kariñosamente nan a pidi pa kompartí e ramada ku nos. Kasi mes ora ku mi a respondé “si”, nan a kuminsá habri bòter di bibida stèrki. I poko despues, un di e damanan sin ningun klase di bèrguensa a bin drumi tòplès nèt pegá ku nos. *Kantika di Amor* a yega kasi mes ora, i nos a kita bai.

Normal mi tin poko kontakto ku turista. Mi ta mira nan bistínan indesente riba kaya, hasiendo kompras, koriendo skuter, èts. Den e kasonan ei, sikiera tabatin un drachi di tela. Ma mi a keda di shòk ku mi enkuentronan ku desnudes mes. I si mi a enkontrá tantu desnudes den korto tempu, **sin duda hende ku ta traha unda turistanan ta frekuentá ta enkontrá muchu mas!**

Siman pasá tabata un advertensia di dekadensia moral den nos komunidad. Hende ta sigui un patronchi ora nan ta eksponé na algu no-étiko. E promé reakshon ta pa **konden’è**. Ma si bo ta eksponé n’è pa basta tempu, i bo ta **toler’è**, pronto lo bo **asept’è**. Ta parsémi ku esei ta loke nos komunidad ta hasi! Nos ta aseptá awe loke nos a kondená ayera. **Ningun komunidad por sigui e patronchi di kondená-tolerá-aseptá, sin keda KONTAMINÁ!**

Añanan pasá, nos a kondená “desnudes turístiko”. Ma pasobra nos tin miedu ku e turista lo hisa bela bai fo’i dj’aki ku su sèn si nos pidié pa bisti su paña, nos a akomod’è na un sitio isolá tras di un muraya pa tapa bista. Ma e “hotèl sunú” no ta isolá mas. Hopi mucha i hóben ta frekuentá e bich nèt pegá! I mi eksperensia di siman pasá ta mustra kla ku desnudes tampoko a keda skondí tras di muraya. Ta parse ku nos a tolerá tantu tempu te ku nos ta aseptá...i talbes asta ta gusta!

Ma pèrmitiendo e turista pa imponé su normanan BAHÓ—mihó bisá, “falta di norma”—riba nos isla TA KOSTA NOS! **E ta kontaminá nos komunidad... nos yunan!** Skritura ta advertí “...un tiki zürdeg ta hasi henter e mansa bira zür. Pesei, saka e zürdeg...” (1 Korintionan 5:6-7).

**Nos tin tantu set pa sèn ku nos ta despuesto pa sakrifiká nos balornan moral i spiritual i asta bienestar di nos yunan** djis pa haña e EUROonan ku e turista ta laga atras? Nos no tin e wes’i lomba pa laga turistanan sa ku akinan no por?

Fásilmente nos por laga hotèlnan duna bishitantenan un foyeto ku ta laga nan sa bon kla ku nos no ta aprobá di desnudes! I naturalmente mester tuma akshon pa ku esnan ku no ke tende. Ma si nan no ta gusta, nan por bai otro kaminda...pasobra **nos yunan i nos balornan ta mas presioso ku nan EUROonan!**